

## Sejauh Manakah Pengaruh al-Qur'an al-Karim Terhadap Orang-orang Yang Bukan Muslimin?

Makalah yang berharga ini ditulis oleh Dr. Ahmad Shalbi di dalam majalah Minbar Islām dan telah diterjemahkan ke dalam bahasa Melayu oleh Ibrahim Fahmi Sekolah Arab Padang Tunku, khas untuk majalah Qalam.

(Terjemahan Ibrahim Fahmi)

Selaku sebuah kitab suci Islam yang menjadi sumber kekayaan fikiran dan rohani, maka ahli-ahli penyelidik dengan tak jemu terus-menerus membahas dan menulis untuk menerangkan gambaran-gambaran tentang kemuliaan al-Qur'ān, menerangkan keindahan dan ketinggian balaghahnya serta menyatakan aspek-aspek perundangan yang mengkagumkan yang terdapat di dalamnya.

Tetapi di sini kita tidak hendak mendasarkan perhatian kita terhadap orang-orang Islam untuk melihat pandangan dan pendapat mereka terhadap kitab suci itu, tetapi kita akan mendasarkan perhatian kita kepada musuh-musuh Islam dan musuh-musuh Nabi Muhammad (S.A.W) untuk melihat sejauh manakah mereka itu menghormati dan memandang mulia akan kitab suci al-Qur'ān itu.

Di bawah ini kita bentangkan suatu kisah berkenaan dengan tiga orang ketua-ketua kaum Musyrikin Mekah yang telah meminati akan kandungan ayat-ayat suci al-Qur'ān yang telah dibaca oleh Nabi Muhammad (S.A.W) kepada sahabat-sahabatnya di setiap malam di Dār al-Arqam. Dengan secara diam-diam mereka bertiga dengan tidak diketahui oleh satu sama lain telah pergi mengintip dan mendengar ayat-ayat suci yang dibacakan oleh Nabi Muhammad (S.A.W) di Dār al-Arqam pada setiap malam:

\* \* \*

Setelah kaum Quraisy mulai melancarkan permusuhan mereka terhadap Nabi Muhammad (S.A.W) dan sahabat-sahabatnya; baginda pada setiap malam pergi ke sebuah rumah yang terletak di pinggir kota Mekah yang dipunyai oleh salah seorang sahabatnya

yang bernama al-Arqam bin Abī Al-Arqam, di sana di dalam rumah itu – yang diberi nama Dār al-Arqam – beberapa orang dari sahabat-sahabat Nabi dengan secara diam-diam dan bersembunyi-sembunyi telah pergi setiap malam ke Dār al-Arqam itu untuk mendengar Nabi Muhammad (S.A.W) membaca ayat-ayat suci yang baharu diterimanya dari Tuhan dari suatu ke suatu masa, serta menghuraikan akan tujuan-tujuan yang dimaksudkan oleh ayat-ayat tersebut.

Pada suatu malam – sebagaimana yang diriwayatkan oleh ahli sejarah yang terbesar (al-Ṭabirī), di Dār al-Arqam Rasulullah (S.A.W) membacakan kepada sahabat-sahabatnya permulaan sūrat Ghāfir:

*(Ḥāmīm tanzīlu al-kitābi mina Allāhi al-'azīzi al-'alīm, ghāfirī al-dhānib, wa qābili al-tāwbi, shadīdi al-'iqāb, dhī al-tāwli lā ilāha illā huwa ilāhi al-maṣīr, mā yujādilu fī āyāti Allāhi illā alladhīna kafarū fa lā yaḡhrurka taqallubuhum fī al-bilād...)*

Ertinya: “Ḥāmīm, Allah sahaja yang mengetahui maknanya, diturunkan kitab ini dari Allah yang Maha Perkasa lagi Maha Mengetahui, Pengampun Dosa dan Penerima Taubat, keras seksaan-Nya, lagi mempunyai kurnia, tidak ada Tuhan selain daripada-Nya kepada-Nya tempat kembali. Tiadalah yang membantah ayat-ayat Allah melainkan orang-orang yang kafir, kerana itu janganlah engkau terpedaya oleh mundur<sup>1</sup>-mandir mereka di dalam negeri...”

Sedang Rasulullah membacakan ayat-ayat itu kepada sahabat-sahabatnya, pada ketika itu di luar rumah Dār al-Arqam kelihatan tiga orang ketua-ketua kaum Quraisy Musyrikin

<sup>1</sup> Perkataan sebenar ialah mundur.

iaitu Abū Jahl, Abū Sufyān dan al-Akhnas bin Sharīf sedang asyik mendengar ayat-ayat yang dibacakan itu dengan secara diam-diam dan bersembunyi di tempat masing-masing. Di antara satu sama lain tidak mengetahui akan kehadiran masing-masing di tempat itu. Setelah selesai pembacaan itu, maka mereka bertiga pun bangunlah dari tempat masing-masing dengan maksud hendak pulang ke rumah, tetapi belum pun sempat Abū Sufyān melangkah kakinya keluar dari kawasan rumah itu, tiba-tiba ia terjerempak dengan sahabatnya Abū Jahl yang juga sedang hendak keluar dari kawasan rumah Dār al-Arqam itu.

Abū Sufyān – (lantas bertanya kepada Abū Jahl):

“Apakah yang menyebabkan engkau datang ke mari wahai anak al-Ḥanzaliyyah”. (Anak al-Ḥanzaliyyah itu adalah nama panggilan terhadap Abū Jahl... P).

Abū Jahl – (Dengan terperanjat lalu menjawab):

“Dan .... dan engkau? Apa yang menyebabkan engkau sampai ke mari?”

Abū Sufyān – “Sudah tentu engkau mendengar Qur’an yang dibacakan oleh Muḥammad kepada sahabat-sahabatnya?”

Sebelum sempat Abū Jahl menjawab pertanyaan yang dikemukakan oleh Abū Sufyān itu, tiba-tiba mereka berdua terlihat kepada satu bayangan orang yang cuba hendak melarikan diri dari kawasan rumah itu, melihat itu Abū Jahl pun terus menyergah.

Abū Jahl – “Siapa itu?... al-Akhnas bin

Sharīf?...Apakah yang menyebabkan engkau datang ke mari?...Sudah tentu tujuan engkau datang ke mari untuk mendengar bacaan-bacaan ayat dari Qur’an Muḥammad itu, bukan?”

Al-Akhnas – (Dalam keadaan serba salah menjawab);

“Aku..aku.. datang..”

Abū Sufyān – (menyampuk): “Berkata benarlah apalah

angkara yang telah menimpa kita bertiga ini?”

Abū Jahl – “Hai Abū Sufyān!...Kita benci

kepada Muḥammad, kita tentang risalah yang dibawa oleh Muḥammad, kemudian kita aniyakan Muḥammad, kerana dia memperhina-hinakan tuhan-tuhan kita yang kita sembah, dan dia mahu merobohkan susunan hidup masyarakat kita...tetapi ini suatu perkara, sedang Qur’an yang dibawa oleh Muḥammad itu adalah suatu perkara yang lain...aku yakin bahawa Qur’an itu bukanlah dari perkataan manusia.”

Abū Sufyān – “Itu memang benar!, tetapi tahukah

kamu berdua, apa yang akan terjadi andainya rahsia kita ini terbuka? Apakah akibatnya kalau orang-orang Quraisy tahu bahawa kita setiap menjelang malam datang ke Dār al-Arqam ini untuk mendengar ayat-ayat Qur’an yang dibacakan oleh Muḥammad kepada pengikut-pengikutnya?”

Al-Akhnas – “Ya, kalau rahsia kita ini terbuka,

akan menjadi suatu kecelakaan kepada kita bertiga, kita akan mereka cap sebagai ketua-ketua yang khianat terhadap agama datuk nenek kita. Sesungguhnya pada setiap kali selesai pembacaan Qur’an itu, hati kecilku sering kali mendorong aku masuk ke dalam Dār al-Arqam ini untuk menyatakan keislamanku kepada Muḥammad.”

Abū Jahl – (Dengan membentak marah): “Diam engkau

wahai al-Akhnas! Mengapa sampai begini sekali kelakuanmu? Mengapa engkau reda kita menjadi pengikut Muḥammad?”

Al-Akhnas – (Dengan marah pula): “Berkata benarlah wahai anak al-Hanzaliyyah, tidakkah jiwamu juga berkata demikian?”

Abū Sufyān – “Tidak sahabatku berdua!, Janganlah kita bertengkar, marilah kita bersama mencari ubat sewaktu kita sedang mengidap penyakit jiwa seperti sekarang ini!”

Al-Akhnas – “Ubatnya mudah sahaja; kita jangan datang lagi ke mari mendengar Qur’an yang dibacakan oleh Muḥammad itu, aku yakin bahawa kalau kita selalu datang mendengarkan bacaan-bacaan Qur’an dari Muḥammad itu sudah pasti lama-kelamaan kita semua akan tertarik supaya beriman kepada risalah yang dibawa oleh anak ‘Abd Allāh itu.”

Abū Jahl – “Aku sangat bersetuju dengan pendapat al-Akhnas itu tetapi bagaimana jalannya untuk mendorong jiwa kita supaya kita jangan datang-datang lagi ke mari?, Kerana selama ini dengan tidak aku sengaja kakiku telah menyeret tubuhku untuk datang ke mari tanpa memikirkan akan akibatnya.”

Abū Sufyān – “Aku fikir jalan yang paling mudah sekali untuk menahan nafsu kita supaya jangan datang-datang lagi ke tempat yang mengandungi sihir Muhammad ini, ialah dengan mengadakan suatu perjanjian yang diikat oleh suatu sumpah atas nama tuhan kita al-Lāt dan al-‘Uzzā. Kita berjanji bahawa kita semua tidak akan datang-datang lagi ke Dār al-Arqam ini.”

Abū Jahl dan al-Akhnas dengan serentak menjawab: “Ya, itu adalah sebaik-baik jalan, sekarang

juga marilah kita mengucapkan lafaz sumpah itu bersama-sama.” (Kemudian mereka bertiga itu pun berjabat-jabatan tangan sambil mengucapkan lafaz sumpah itu dengan suara yang satu): “Kami berumpah dengan nama al-Lāt dan al-‘Uzzā bahawa kami tidak akan datang lagi ke tempat ini.”

Setelah itu mereka bertiga itu pun pulang

ke rumah masing-masing.

\* \* \*

Di malam berikutnya Rasulullah (S.A.W) seperti biasa datang ke Dār al-Arqam berkumpul bersama-sama dengan sahabat-sahabatnya untuk membacakan ayat-ayat suci yang baharu baginda terima dari Tuhan melalui wahyu pada malam itu baginda membacakan sebahagian daripada sūrat al-Furqān:

(Tabāraka alladhī nazzala al-furqāna ‘alā ‘abdihi li yakūna

li al-‘ālamīna nadhīrā, alladhī lahū mulku al-samāwāti wa al-arḍi wa lam yattakhidh waladā, wa lam yakun lahū sharīkun fī al-mulki wa khalaqa kulla shay’in fa qaddarahū taqdīrā...)

Ertinya: Maha Berkat Tuhan yang menurunkan kepada hamba-Nya, supaya menjadi peringatan buat seluruh alam.

Tuhan yang bagi-Nyalah pemerintahan langit dan

bumi, tiada Ia beranak dan tiada bersekutu

siapa pun dalam pemerintahan-Nya: Dan Dia

telah menjadikan segala sesuatu lalu

ditakdirkan-Nya menurut qadar-Nya...”

Nun di sana tidak berapa jauh dari Dār al-Arqam,

kelihatan Abū Sufyān sedang berdiri dengan rupa

gelisah seorang diri sambil berkata kepada dirinya

sendiri: “Sekarang aku di dalam perjanjian tidak

boleh lagi pergi mengintip ke Dār al-Arqam untuk

mendengarkan Qur’an yang dibacakan oleh Muḥammad kepada

sahabat-sahabatnya orang Islam, sedangkan perasaan hati

kecilku mendorong supaya aku pergi ke sana; jadi

apa yang mesti aku buat? Adakah aku akan pergi juga ke sana? Tetapi bagaimana, aku telah bersumpah dengan nama berhala al-Lāt dan al-'Uzzā bahawa aku tak boleh lagi pergi ke sana? Oh, ya... ini suatu peluang bagiku untuk mendengar ayat-ayat Qur'an yang akan dibacakan oleh Muḥammad pada malam ini, kerana Abū Jahl dan al-Akhnas sudah tentu tidak datang ke sana pada malam ini kerana mereka takut melanggar sumpah mereka. Kalau begitu lebih baik aku pergi sahaja ke Dār al-Arqam itu untuk menikmati ayat-ayat Qur'an yang akan dibacakan oleh Muḥammad pada malam ini, seorang pun tidak akan dapat melihat aku pergi dan pulang.”

Setelah itu maka ia pun terus melangkah kakinya memasuki kawasan Dār al-Arqam itu dan duduk bersembunyi di suatu tempat yang gelap.

Nun di sana di suatu sudut yang lain kelihatan pula al-Akhnas bin Sharīf sedang berjalan-jalan mundar-mandir di halaman rumahnya sambil memikirkan dalam hatinya: “Dapatkah al-Lāt dan al-'Uzzā itu melarang aku dari mendengar ayat-ayat Qur'an yang akan dibacakan oleh Muḥammad pada malam ini? Siapa tahu barangkali sahabatku Abū Sufyān dan Abū Jahl telah tidak menepati janji dan melanggar sumpahnya dan terus sahaja keduanya pergi mendengar ayat-ayat Qur'an yang dibacakan oleh Muḥammad pada malam ini, maka di kala itu bolehlah aku membongkar rahsia mereka berdua; walaupun mereka berdua setia kepada janjinya dan tidak melanggar sumpahnya, maka beruntunglah aku dapat menikmati kelazatan ayat-ayat Qur'an yang dibawa oleh Muḥammad itu seorang diriku dengan tidak diketahui dan dilihat oleh siapa jua pun.” (Lalu ia pun terus berjalan menuju ke Dār al-Arqam dengan berhati-hati memandangi ke kiri dan kanan melihat kalau-kalau ada orang yang memperhatikan gerak-gerinya itu. Sampai di sana duduklah ia dekat penjuru rumah Dār al-Arqam itu bersiap diri untuk mendengar Nabi Muhammad membacakan ayat-ayat suci

dari al-Qur'an kepada orang-orang Muslimin.

Di pinggir Kaabah kelihatan pula Abū Jahl sedang duduk termenung seolah-olah ada barang sesuatu yang sedang difikirkannya, dia ke sana dengan tujuan untuk melawan nafsunya dari didorong oleh perasaan hendak pergi mendengar ayat-ayat Qur'an yang akan dibacakan oleh Nabi Muhammad (S.A.W), pada malam itu di Dār al-Arqam, tetapi perasaan jiwanya tetap berbisik kepada hati kecilnya: “Apakah Abū Sufyān dan al-Akhnas akan menepati sumpah mereka? Berat sangkaku bahawa mereka berdua akan patuh kepada sumpah dan janjinya. Tetapi sanggupkah mereka berdua menahan diri dari pergi mendengar Qur'an Muḥammad seperti kebiasaan yang dilakukan oleh keduanya pada setiap malam itu? Jiwaku tak sanggup berbuat demikian, kerana penjuru gelap rumah Dār al-Arqam itulah yang sentiasa mengasyikkan aku mendengar perkataan-perkataan Muḥammad yang dibacakannya dari Qur'annya itu setiap malam. Jumlah kata yang dibacanya itu adalah setinggi-tinggi perkataan yang pernah mengetuk pintu hatiku dari sejak aku mengenali ketinggian balaghah dan kefasihan kata-kata puisi dan prosa yang selalu diucapkan oleh datuk nenekku di zaman-zaman yang silam. Ah, akan rugilah aku pada malam ini kalau aku tidak pergi mendengar dan menikmati ayat-ayat Qur'an yang akan dibacakan oleh Muḥammad itu: aku pasti akan pergi ke sana dan celakalah siapa-siapa yang berani menghalang kehendakku pada kali ini.” (Lalu ia pun terus bangkit dari tempat duduknya dan berjalan keluar meninggalkan Kaabah menuju ke Dār al-Arqam yang tidak berapa jauh dari situ).

Di waktu mereka itu dengan diam-diam mengambil tempat masing-masing di bawah Dār al-Arqam, dengan masing-masing tidak mengetahui akan kehadiran antara satu sama lain; seperti biasa Rasulullah (S.A.W) telah sampai pembacaannya kepada firman Allah yang berbunyi:

(Wa qāla alladhīna lā yarjūna liqā'anā lāw lā unzila 'alaynā  
al-malā'ikatu aw narā rabbanā, laqadi istakbarū fī anfusihim  
wa 'ataw 'utuwwan kabīrā....)

Ertinya: “Dan berkatalah orang-orang yang tidak mengharap akan  
bertemu dengan Kami; mengapa tidak diturunkan  
malaikat kepada kami, atau dapat kami melihat  
Tuhan kami, sesungguhnya mereka itu sangat  
membesarkan diri mereka serta sangat  
melampaui batas...”

Di kala sampai Rasulullah membaca firman Allah yang  
berbunyi:

(Wa yawma ya'udḍu al-zālimu 'alā yadayhi yaqūlu yā laytanī  
ittakhadhtu ma 'a al-rasūli sabīlā, yā waylatā laytanī lam attakhidh  
fulānan khalīlā)

Ertinya: “Dan pada hari itu orang-orang yang aniaya  
(kafir) menggigit hujung jari-jari mereka  
kerana penyesalan yang tidak terhingga di atas  
kekafiran mereka itu sambil berkata: Alangkah  
baiknya jika aku di masa dahulu mengikuti  
jalan yang telah ditunjukkan oleh Rasul. Hai  
celakanya aku! Alangkah baiknya jika aku tidak  
bertemu dengan si fulan itu!”

Maka di kala itu mereka bertiga pun menggigit  
anak-anak jarinya dan sambil mengikuti membaca ayat itu  
bersama dengan Nabi (S.A.W) tidak berapa lama kemudian dari  
itu kedengaranlah Rasulullah menamatkan pembacaannya  
dengan mengatakan: (Ṣadaqa Allāhu al-'azīm). Maka masing-masing  
mereka pun bangunlah dengan perlahan-lahan hendak kembali  
pulang ke rumah. Salah seorang daripada mereka bertiga  
itu, iaitu Abū Sufyān berfikir di dalam hatinya:

“Adakah Abū Jahl dan al-Akhnas mematuhi sumpah  
setia mereka, ataupun mereka berdua melanggarinya  
seperti aku juga? Kalau begitu untuk menghilangkan  
rasa ragu-raguku, sebelum aku pulang lebih baik aku pergi

melihat mereka berdua kalau-kalau keduanya berada di tempat ini.  
Setelah itu maka ia pun berjalanlah mengelilingi kawasan  
Dār al-Arqam itu, tidak berapa lama ia pun bertemu dengan  
Abū Jahl yang sedang bersiap-siap hendak pulang, lantas  
disergahnya:

Abū Sufyān – “Abū Jahl? Rupanya engkau datang  
juga mendengar Qur'an yang dibacakan oleh  
Muḥammad pada malam ini? Kiranya engkau telah  
melanggar akan sumpahmu yang telah engkau  
ucapkan atas nama al-Lāt dan al-'Uzzā  
itu...dan ayat-ayat dari Qur'an Muḥammad  
menarik engkau datang ke mari untuk  
mendengarnya.”

Abū Jahl – “Ah, jangan cuba hendak menuduh  
aku seorang yang melanggar sumpah itu,  
engkau juga seperti aku juga, kalau  
tidak mengapa engkau berada di tempat ini  
sekarang?”

Abū Sufyān – “Ya, aku mengaku yang aku telah melanggar  
sumpahan yang telah kita ucapkan seperti  
engkau juga; kita telah sama-sama bersalah,  
sekarang marilah kita melihat pendirian  
sahabat kita al-Akhnas, sesudah itu  
baru kita berunding semula. Kemudian  
mereka berdua pun berjalanlah mengelilingi  
kawasan rumah itu. Tiba-tiba dari jauh  
mereka terlihat al-Akhnas sedang tergesa-gesa  
berjalan cuba hendak melepaskan diri  
dari pandangan orang. Melihat itu Abū  
Jahl lantas berseru:

Abū Jahl – “Hai al-Akhnas!...kami sudah  
nampak kepadamu, janganlah cuba hendak  
melepaskan diri dari pandangan kami.  
Marilah ke mari kita berunding dan  
membuat perjanjian yang baru pula.”

(Al-Akhnas buat pura-pura tidak dengar akan seruan Abū Jahl itu, ia terus juga berjalan hendak melepaskan dirinya, tetapi ia sempat dikejar oleh Abū Jahl dan Abū Sufyān).

Abū Sufyān – “Telah berulang kali tragedi kita ini berlaku dan kita tak berdaya untuk mengatasinya, saya berasa bimbang lambat laun rahsia kita mencintai ayat-ayat Qur’an yang dibaca oleh Muḥammad itu akan terbuka juga sudahnya, dan ini akan mendatangkan sesuatu musykilah hidup kita yang besar sebagai ketua orang ramai.

Abū Jahl – (Sambil menundukkan kepala berkata dengan suara yang lemah lembut meminta fikiran):  
“Habis bagaimana? Apa yang mesti kita buat sekarang ini?”

Al-Akhnas – “Sesungguhnya kaki, nafsu dan jiwaku telah menyebabkan aku mengkhianati sumpahku dan menyeret anggotaku datang ke tempat yang bersihir ini.”

Abū Sufyān – “Perkara yang telah terjadi itu biarlah ia berlalu dengan begitu sahaja, kita bertiga telah sama-sama mengkhianati sumpahan yang telah kita ucapkan itu; sekarang apa fikiran kamu berdua tentang perkara ini?”

Al-Akhnas – “Menurut fikiranku, kita harus memilih antara dua jalan, beriman kepada agama yang dibawa oleh Muḥammad ataupun kita terus kufur kepadanya.”

Abū Jahl – “Tak ada jalan untuk beriman dan tak ada jalan untuk kita terus-menerus menyembah berhala.”

Abū Sufyān – (Dengan terperanjat dan marah):

“Apa katamu wahai Abū Jahl? Mengapa... mengapa engkau berani mengeluarkan kata-kata yang sedemikian rupa. Rupa-rupanya engkau ingin keluar dari agama datuk nenek kita dan cuba hendak mengingkari tuhan-tuhan berhala kita? Tariklah kembali akan kata-katamu yang merbahaya itu!”

Abū Jahl – “Wahai Abū Sufyān! Sebenarnya aku sangat takut dengan hari yang disifatkan oleh Muḥammad dengan katanya: “Dan pada hari itu (Hari Kiamat) orang-orang yang aniayai (kafir) menggigit telunjuknya kerana rasa penyesalan yang tidak terhingga...”

Al-Akhnas – “Oh, rupanya sekarang sahabat kita Abū Jahl telah sudah hafaz dengan segala perkataan Qur’an yang dibacakan oleh Muḥammad kepada pengikut-pengikutnya orang-orang Muslimin.”

Abū Jahl- “Datuk nenek kita di zaman dahulu, pernah menghafaz jumlah-jumlah kata-kata syair yang indah dan tinggi mutunya serta digantung pula di dalam Kaabah sebagai tanda penghargaan kepadanya; namun begitu kata-kata Qur’an yang diucapkan oleh Muḥammad itu jauh lebih indah dan lebih bermutu dari jumlah-jumlah kata syair yang diminati oleh datuk nenek kita di zaman silam itu. Jumlah-jumlah kata syair itu adalah digubah oleh otak-otak manusia yang terdiri dari kaum sasterawan yang terkenal sedang jumlah-jumlah kata Qur’an yang dibacakan oleh Muḥammad itu adalah sesuatu yang mengatasi kesanggupan otak manusia menciptanya, kerana ia lebih indah dan lebih bermutu dari jumlah-jumlah kata syair.”

Abū Sufyān – “Terpengaruh dengan ayat-ayat Qur’an

yang dibawa oleh Muhammad itu adalah sangat merbahaya kepada kita dan boleh jadi akan membawa kepada hilangnya pengaruh dan pendirian kita terhadap orang ramai.”

Al-Akhnas – “Ya, kita akan kehilangan pengaruh kalau kita kurang berjaga-jaga dalam soal ini, oleh yang demikian kita mestilah mencari suatu jalan penyelesaian yang licin dan bijak.”

Abū Sufyān – “Tiada jalan yang lebih baik selain dari kita membaharui janji dan sumpah setia agar kita berhenti dari melakukan kecurangan datang mendengar ayat-ayat Qur’an yang dibacakan oleh Muḥammad itu; sebenarnya ayat-ayat Qur’an yang dibacakan oleh Muḥammad itu mengandungi sihir yang halus dan tajam untuk menarik hati kita supaya beriman kepada agama baru yang disiarkan oleh Muḥammad itu. Beriman kepada Muḥammad bererti kita mencari bala bencana yang besar, kita akan kehilangan pengaruh dalam masyarakat Mekah, kita akan kehilangan harta kekayaan, kehilangan hamba-hamba tebusan dan kehilangan kuasa di kota Mekah ini. Oleh itu kita harus mempertahankan diri dari terceburlah ke dalam perangkap yang dipasang oleh Muḥammad melalui ayat-ayat Qur’an yang mengandungi sihir itu.”

Abū Jahl – “Ya, pendapatmu itu sangat benar wahai Abū Sufyān, kita mestilah jangan datang-datang lagi ke tempat ini.”

Al-Akhnas – “Aku bersetuju dengan pendapat kamu berdua. Sekarang juga kita mestilah berjanji dan membaharui sumpah setia yang telah kita khianati itu.” Kemudian

mereka bertiga pun berpegang-pegangan tangan menjalankan upacara mengangkat sumpah sambil sama-sama melafazkan ucapan sumpah itu): “Kami bersumpah dengan nama Hubal tuhan yang terbesar, dengan nama al-Lāt wa al-‘Uzzā dan Manāt, bahawa kami berjanji tidak akan datang-datang lagi ke Dār al-Arqam ini untuk mendengar Qur’an yang dibacakan oleh Muḥammad, dan bahawa kami tetap taat dan setia dengan sumpah ini demi kebaikan iktikad kami terhadap agama dan kehormatan masyarakat kami.”

Sesudah selesai upacara mengangkat sumpah itu mereka jalankan, maka mereka bertiga pun bersurailah pulang ke rumah masing-masing.

\* \* \*

Tetapi dapatkah mereka mematuhi janji dan mentaati sumpah setia yang telah mereka baharui itu, sanggupkah mereka menahan jiwa mereka yang lemah itu dari tarikan kelazatan ayat-ayat Qur’an yang mengatasi kalimah-kalimah syair yang mereka nikmati itu? Jawabnya tentu tidak...mereka tak sanggup mematuhi segala janji dan sumpah setia yang telah mereka lakukan dengan bersungguh-sungguh dengan menggunakan nama tuhan-tuhan mereka yang terbesar Hubal, al-Lāt, al-‘Uzzā dan Manāt itu. Dengan secara diam-diam mereka bertiga tetap juga pergi ke Dār al-Arqam pada malam berikutnya dengan menyangka bahawa pada kali ini teman-teman mereka yang lain tidak akan berani lagi melanggar sumpah mereka; kerana tarikan dari keindahan ayat-ayat suci yang dibacakan oleh Nabi Muhammad (S.A.W) pada tiap-tiap malam itu tidak dapat mereka lupakan walau sedikit yang mendorong mereka terpaksa pergi juga untuk mencari nikmat kelazatan dari ayat-ayat Qur’an itu, sekalipun mereka ketahui bahawa perbuatan

mereka itu salah di dalam kepercayaan agama mereka.

Setelah selesai Nabi (S.A.W) selesai daripada membacakan ayat-ayat Qur'an itu kepada sahabat-sahabatnya orang Muslimin, maka mereka bertiga sahabat itu bertemu lagi di dalam kawasan Dār al-Arqam itu dengan perasaan yang malu. Pada kali ini mereka tak dapat berkata apa-apa beberapa ketika; kemudian dengan rasa kemalu-maluan Abū Sufyān pun berkata:

Abū Sufyān – “Sahabatku berdua! Nampaknya kita bertiga ini sudah tidak mempunyai pendirian sama sekali dan tidak berdaya lagi untuk mematuhi sumpah setia yang telah dua kali kita lakukan. Aku fikir kalau kita sentiasa berjauhan di antara satu sama lain kita tidak akan sanggup menahan tarikan sihir yang dibawa oleh ayat-ayat Qur'an yang dibacakan oleh Muḥammad; kaki dan hati kita pasti menarik tubuh kita setiap malam ke tempat ini. Kalau begitu aku ada suatu cadangan baru untuk menguatkan azam kita dan untuk menghalang kita dari datang ke tempat ini lagi.”

Abū Jahl – “Ya, nyatakanlah cadanganmu yang baru itu, kami berdua sudah bingung tidak dapat lagi hendak memberikan sebarang fikiran!”

Abū Sufyān – “Aku bercadang pada setiap malam, di waktu Muhammad sedang membacakan ayat-ayat Qur'an itu kepada pengikut-pengikutnya, kita bertiga hendaklah bertemu di suatu tempat yang jauh dari Dār al-Arqam ini. Kita akan bersurai kembali kemudian daripada selesainya Muhammad menerangkan tafsir ayat-ayat Qur'an kepada sahabat-sahabatnya itu. Dengan cara ini dapatlah

kita awas-mengawasi di antara satu sama lain! Bagaimana fikiran sahabat berdua?”

Al-Akhnas – “Ini adalah satu cadangan yang baik sekali, dengan cara demikian dapatlah kita melepaskan diri dari tarikan sihir Qur'an Muḥammad itu.”

Abū Jahl – (menyampuk): “Ya, inilah juga satu jalan untuk mengelakkan kita dari mendapat hidayah.”

Abū Sufyān – “Diam kau Abū Jahl! Rupanya selama ini sihir Muḥammad itu telah dapat mempengaruhi jiwamu? Patutkah engkau katakan seruan yang dibawa oleh Muḥammad itu suatu hidayah?”

Abū Jahl – “Ya, memang benar, seruan yang dibawa oleh Muḥammad itu adalah suatu hidayah... tetapi...”

Abū Sufyān – “Tetapi apa?” (Dengan suara yang membentak).

Al-Akhnas – “Sudahlah sahabatku, berhentikanlah pertengkaran yang sesia itu. Marilah sekarang kita pulang sahaja sebelum hal kita diketahui oleh orang lain.”

Abū Jahl – “Tetapi sebelum kita bersurai marilah kita menentukan di mana kita akan bertemu pada tiap-tiap malam?”

Al-Akhnas – “Aku lebih bersetuju kita bertemu dan berkumpul di rumah Abū Sufyān sahaja.” (Abū Sufyān hanya mengangguk-anggukkan kepalanya tanda bersetuju dengan cadangan yang dianjurkan oleh Al-Akhnas itu. Kemudian masing-masing pun beredarlah dari tempat itu)